

Prezidénsia Konsellu Ministrus

VIII Governu Konstitusionál

Komunikadu Imprensa

Konsellu Ministru hala'ó sorumutuk liuhusi vídeo konferénsia no hafoin halo análize ba **aprezentasaun husi koordinadór sira Sentru Integradu Jestaun Krize (CIGC)**, kona-ba pontu situasaun epidemiológika nasional, aprova ona projetu Dekretu Governu nian ba **alterasaun dahuluk ba Dekretu Governu nu. 6/2021, laron 2 fulan-marsu, kona-ba medida sira ezekusaun Deklarasaun Estadu Emerjénsia nian ne'ebé efetua husi Dekretu Prezidente Repúblika nu. 15/2021, laron 1 fulan-marsu, tama iha vigór to'ó tuku 23:59 iha laron 2 fulan-abril tinan 2021.**

Ho alterasaun ida ne'e, izolamentu terapéutiku bele hala'ó iha uma, tuir despaxu fundamentadu husi Ministra Saúde.

Prevee mós katak bele iha possibilidade atu hala'ó izolamentu profilátiku obrigatóriu (kuarantena) iha uma no despeza hirak ne'ebé relasiona ho izolamentu profilátiku ne'e suporta husi individu u ida-idak bainhira kumpre iha estabelesimentu saúde, rezidénsia ka iha sentru izolamentu privadu sira.

Projetu Dekretu Governu ne'e define mós katak sidadaun hotu-hotu ne'ebé hela iha Timor-Leste tenke evita formasaun halibur-malu nian, iha dalan públiku. Ba efetu husi Dekretu Governu nian ne'e, konsidera nu'udar ema halibur malu maka ema liu husi na'in rua halibur malu menus husi metru rua entre sira.

Responsável sira husi rejionál, munisipál no lideransa komunitária sira, ba oin, sei iha mós devér espesial ba kooperasaun nian atu halo fiskalizaun, monitorizasaun no supervizaun kona-ba kumprimentu izolamentu profilátiku ka terapéutiku nian sira no mós atu garante ema sira atu labele halibur malu iha estrada públiku sira.

Konsellu Ministru aprova mós projetu sira Rezolusaun Governu nian ba **renovasaun impozisaun serka sanitária no konfinamentu domisiliáriu jerál ba populasaun iha munisípiu Baukau no Vikeke to'ó tuku 23:59 laron 2 fulan-abril tinan 2021.**

Nafatin mantein regra sira hotu ne'ebé antes ne'e defini ona iha Rezolusaun Governu nu. 17/2021, 18/2021, 19/2021 no 20/2021, laron 15 fulan-marsu, ne'ebé impoin serka sanitária sira no konfinamentu domisiliáriu iha munisípiu Baukau no Vikeke.

Nune'e, kontinua bandu sirkulasaun ema nian entre munisípiu rua ne'e ho sirkunskrisaun administrativa sira-seluk, exetu iha kazu sira ne'ebé ho fundamentu forte tanba razaun sira seguransa públika, saúde públika, assisténsia umanitária, manutensaun husi sistema sira ba abastesimentu públiku ka ba realizasaun interese públiku nian.

Mantein nafatin mós impozisaun no konfinamentu domisiliáriu jerál ba ema hotu ne'ebé hela no daudaun ne'e iha munisípiu Baukau no Vikeke, exetu ba razaun sira ne'ebé mak antes ne'e defini ona, liuliu razaun sira ba saúde, ba servisu, no ba asesu kona-ba sasan no servisu sira primeira nesiedade nian. **REMATA**